

Crodi e mût di crodi

Come che o vês sintût intes leturis che o vin fatis in cheste Messe, mi pâr che al vegni sù un teme di fonts, facil di sotliniâ: la persone di Crist.

Parcè che al è di dîsal une vore clâr, in zornade di vuê: il Cristianisim nol è une serie di dogmis di crodi e di parâ jù, ancje par fuarce cualchi volte; nol è une serie di comandaments di osservâ la domenie e cualchi volte disdivore, ma al è semplicementri un fidâsi, un lassâsi puartâ de persone di Crist.

Chel che al crôt in fonts al è un che al è sigûr, e che si fide che la persone di Crist, e cussì ancje la sô peraule, e sei misteriosementri zontade cun Diu. Parcè che al è dome par chest motîf, savêso, che si pues crodi che doi mil agns indaûr, o li ator, al sei sucedût in chest mont un fat: la muart e la resurezion di Crist che e sei la nestre salvece.

Ce tantis voltis che o fevelin di salvece, nô! Ce tantis voltis in glesie no vêso sintût a dî che Crist al è il nestri Salvadôr! Ma ce vuelial dî salvâsi? Salvâsi di ce? A son tancj cumò che a fevelin di salvecis in chest mont. No fevelin mâl, a fevelin tantis voltis ben. In chest mont o vin bisugne di tantis salvecis. Cjalaiti intor: nô furlans, di cetantis salvecis no vino bisugne! Ma no son chestis lis salvecis che al fevele Crist. Crist al dîs di jessi il nestri Salvadôr, e a son passâts vincj secui che nus à dite cheste peraule, e nô o continuin a crodi che al sei il nestri Salvadôr ancje se dopo di Lui il mont al è lât pressapôc come che al lave prin. Al è clâr che la sô salvece e vûl dî une robe che si pues dome crodi, ma no viodi.

Nus salve, par mâl che nus vadin lis robis in chest mont. Cjalait che nus laran mâl a ducj: ducj o murarìn. La muart e je une pierre che ti tapone dute la vite e che te fâs passâ par simpri. Crist nus salve ancje se o murìn! Crist nus salve ancje se o sin pecjadôrs, se o vin su la schene i pecjâts di dut il mont.

Nol esist un om vonde inicui par che Crist no lu salvi. Nol esist un om vonde disgraciât par che Crist no lu consoli! No esist une umanitât che e passi cence lassâ segn di se su la tiere e che Diu no le salvi.

Voaltris mi domandarês: ma di ce salvece si tratial? No lu sai. O sai dome che Crist mi salve par mâl che a vadin lis robis.

Par chel, tal periodi di Pasche il cristian nol pues no sintî une ligrie, une gjonde tal fonts da la anime; no si trate di une ligrie di chest mont ma di une ligrie profonde che, par mâl che al vadi il mont, Crist, la persone di Crist (i cristians a disevin, tai prins secui "il Signôr", "o KYRIOS", il Paron de comunitât di chei che a crodin) nus salvarà!

E e va ben dite ancje une altre peraule in cheste ocasion: che la fede in Lui e vûl dî lassâsi puartâ di Lui, crodi ancje là che no si rive adore di viodi. Visînsi di Tomâs, tal Vanzeli di vuê!

Al vûl dî che la fede nus perdona dut; la fede nus salve di dut. Pauli apuestul, tal prin secul al à dite chestis peraulis, che nus fasin tant ben, almancul a mi mi fasin tant ben: la fede e libere di dut!

E libere ancje de leç! E il cristian nol è dome un che al ubidîs a cualchi leç. Nol è un che al ubidissi a cualchi comandament, al è un che al è libar di dut.

Procurait di capîmi ben. Al è libar di dutis lis leçs, ancje di chês gleseastichis, parcè che ta la anime al è marcât di Crist; al è il plui libar di ducj e il plui leât di ducj ta la anime, te cussience. Cjalait che une fede di chest gjenar pardabon nus libere di dut.

E alore o capìn une robe: nus libere di dut, nus libere ancje, perdonaitmi la peraule e capîtle ben, nus libere ancje de lenghe latine te Messe.

Nus libere di dut, nus da la libertât di doprâ dut ce che nus fâs ben, dut ce che, in cualchi maniere, nus zove par podê svicinâsi a Lui; ancje cheste nestre semplice, sclete e francje lenghe furlane che e je buine di dî in semplicitât, cence complicazions, cence retorichis, ce che te semplicitât da la anime o vin ducj intorsi.

Cun Diu nol ocor contâle gruesse, nol ocor cirî peraulis che no si doprin te vite di ogni dì, si pues dîsi propit cu la lenghe di ogni dì ce che o vin ta la anime. Cun chês stessee lenghe, o podìn celebrâ la ultime cene che al à celebrade Lui; ancje Lui in chês sere al à doprât la sô lenghe, chês che al doprave su lis placis di Jerusalem e pa lis contradis de Galilee.

Rutârs 25-03-72